

張文襄公奏議

張文襄公全集卷十九

奏議十九

瓊軍獲勝籌辦招撫摺

光緒十二年十一月二十七日

竊臣前因瓊州客黎各匪殘害地方爲患日鉅奏請特派統兵大員大舉澈辦勦撫兼施奉旨此項客黎各匪必應分別良莠勦撫兼施著馮子材督率各營相機辦理以靖地方等因欽此仰見宸謨廣運誅暴救民之至意曷勝欽佩查前奏聲明黎則先勦積年逆首陳鍾明一股先將附和擾害之外匪亂黎痛加懲創以次招徠良黎誠以馮子材到瓊之初各匪聞風懾伏獨陳鍾明

一股糾眾寇掠定安縣南閭仙溝雷鳴各市焚殺慘酷
擾及澄邁是其力悍性頑又在諸匪之上諸亂黎素奉
爲總頭目全瓊軍民苦之亟應先行翦滅以彰天討疊
准馮子材咨報打密什密兩寨爲逆首陳鍾明巢穴地
居萬山之中道路險遠馮子材自督總兵林長福知府
馮相華諸軍進攻中路派知府馮相榮通判劉保林率
軍由萬州東路進兵夾擊與中路之軍會於什密飭道
員方長華率瓊軍出西路由儋臨一帶進兵會攻黎山
以分賊勢兼以控禁客匪使其不能與黎匪合勢助逆
陳鍾明聞大軍將至先退入嶺門內之打密黎巢該處

地勢險邃該逆於沿路密插竹籤漬以藥水塞斷隘路其溪澗上流均先期下毒陳鍾青則踞萬州之長沙寨與爲犄角馮子材一面整軍進攻並飭道員方長華通判劉保林等設法招致匪黨林開信令誅陳鍾青以自贖密飭萬州文武紳團乘機進擊以爲官軍嚮導八月二十一日林開信偕兄開忠夥黨符用廷等密約該處團勇潛入逆寨突起圍擒匪眾驚起救護格鬪林開信等與團勇等奮勇衝擊將陳鍾青殺斃斬獲該匪首級並斷其六指右手一隻生擒逆子陳添與等餘匪被團勇擊散官軍繼進當將長沙一寨奪據查點團勇間有

受傷林開信林開忠受傷尤重維時陳鍾明尙在打密
聲言親督大股赴萬州九甲復仇九月十三日馮子材
親駐嶺門督飭各軍踰險深入十五日知府馮相華率
萃中右各營至雙溪灘正將渡河之際瞥見對岸山上
有賊柵一座匪眾三百餘人鳴鑼吹角下山迎撲都司
張福啟首先突擊各營皆奮勇攻戰約一時許匪始挫
敗乘勝疾追河寬三里其地無橋梁船筏將士皆鳧水
而渡進至黃竹賊於當路樹石柵二峙列左右槍自石
縫中出我軍分路冒險進攻都司譚信祖奪獲左柵都
司張福啟攻破右柵各軍一湧而進匪勢不支翻崖穿

林而遁因天晚樹密未能窮追計共破賊柵三獲槍械
旗幟多件該匪中槍斃者率由後隊拖匿巖峒約數十
起官軍亦傷亡十二名淹斃三名此初次進剿攻克雙
溪灘黃竹等賊柵之實在情形也十七十八等日遊擊
馮驊知縣蔡其銘攻奪二渡溪喃喻等賊柵二十日張
福啟譚信祖蔡其銘馮驊冒雨攻奪總口山要隘二十
一二十三二十九十月初一等日總兵林長福守備陳
江志張有德由八村進破牛軛壟暫對分界嶺等賊柵
計數日內馘級生擒共百餘名搜斬二十九名擒獲匪
目王那寒陳亞六卓均勝范蒟蘭范亞二黃三林觀松

等我軍被賊槍彈毒籤傷亡者四十餘名其東路一軍知府馮相榮通判劉保林由萬州九甲進勦西峒之黎以斷賊援九月二十一二十二二十三二十八二十九等日參將符堅高守備陳才業由田心進攻克南水峒參將梁振基副將馮紹珠由水割村進攻克番署坡竹窟嶺等處焚燬黃志成匪棚都司陳榮坤與符堅高梁振基陳才業由竹窟嶺進合軍力戰攻破西峒匪首陳文中逆巢獲其妻小斃匪甚多奪獲大礮一糧米火藥軍械甚夥弁勇受傷二十餘人各軍距打密漸近該逆退至打密以內二十里之什密老巢率眾死守中隔溪

水三道連日盲風陰雨嵐霧迷漫咫尺不辨十月初旬
天氣漸晴中路各軍涉水進攻馮相榮劉保林亦率各
營從東路會攻漸逼賊巢初六日馮相榮劉保林親督
都司王得標哨弁楊步雲廖得琳楊士丞馮明進等冒
險進攻什密守備蔡必壽哨弁陳德芳龔源桂從山旁
小路合擊千總黃輔成哨弁陳學榮李暢春攀崖緣樹
繞攻山後馮相榮林長福亦督軍趕到合軍逼攻以火
箭火藥包射擲棚內斃匪極多自辰至未攻擊四時之
久始將什密賊巢攻破逆首陳鍾明率死黨突向後山
逃逸蔡必壽追及該匪等回頭拒戰當經蔡必壽將陳

鍾明砍斃生擒逆子陳良嶸一名搜斬悍匪數十名餘
匪踰山亂竄計陳鍾明一股悍黨悉就殲除此疊次攻
破棚卡及攻克陳鍾明老巢殲除首逆之實在情形也
惟是此股巨匪就平以外各峒亂黎歷年勾結外匪凶
殺擾害者大小尙十餘股多在萬州陵水一帶亟須分
別辦理中路諸軍自深入黎峒以來糧運艱阻冒雨涉
水饑凍交乘兼以染受瘴氣水毒疫病不支營官哨弁
歿者十餘勇丁尤夥馮子材當將萃中萃右兩軍暫行
撤出嶺門屯紮烏坡就醫督飭別營由萬州陵水進剿
馬嶺匪首黃清廖二弓匪首胡那肥兩股馬嶺匪寨林

密濠深該匪火器甚多我軍連日進攻伐其竹木二十
九日馮相榮劉保林督軍力攻竟日哨弁區錫鏞梁廷
獻斬柵先登立將馬嶺匪巢攻破斃匪數十名生擒黃
亞濃王亞董符代貞三名奪獲抬槍洋槍多件匪首黃
清由巢後地孔竄出率餘眾奔赴廖二弓陳文中亦附
餘各軍追擊俱有斬擒哨弁楊步雲楊士丞斬馘最多
獲賊礮二此次斃匪甚多我軍亦有傷亡查陵水山內
黎峒每一峒稱爲一弓廖二弓在馬嶺東三十餘里山
勢險阻爲五十年以來陵水黎匪肇亂之地與哮黎十
八村接壤該弓收集各匪七八百人與哮黎匪眾千餘

聯爲死黨哮黎一種在羣黎中最爲蠻悍三十日攻克
廖二弓匪巢哮黎來援爲我軍擊退十一月初一日進
剿十八村哮黎該匪潛伏山溝叢草中伏礮邀襲官軍
斃勇丁四人馮相華劉保林分飭諸軍用槍礮四應轟
擊斃匪無數該匪始披靡敗退不能歸巢由山僻小路
四竄擒獲哮黎匪首黃亞養所有十八村等處卡寨三
十餘以次一律焚燬此續剿馬嶺廖二弓十八村等處
獲勝迭平逆寨之實在情形也刻下近外黎山一帶悍
匪屢殲賊巢多毀樂會七峒總匪首王打文素習邪術
夥黨千餘積年攻剽焚殺村寨受害者無算其爲匪尙

在陳鍾明之先亦經定安團紳訓導莫如瑾等率團圍擒解營伏誅馮子材已由萬州馳赴陵水親督官軍暨官吏紳團招諭良黎令其薙髮歸化一面搜勦各匪一面伐木開山節節廓清期於直抵五指山爲開通十字路之計至道員方長華所統瓊軍由西路進兵自駐和舍司那大市等處該處爲澄邁臨高儋州界上客黎錯雜之地先招撫白沙峒花黎犒以牛酒諭令開路前導抗拒者卽行助勦欣然聽命元門峒黎三百餘夙稱凶悍地有金鑛亦願薙髮改裝歸化又干脚峒黎符朝志等聲稱靜候安撫該道分別犒勞卽派營官遊擊李渭

培提督邵升堂參將桑儒修遊擊徐永元率四營進元
門峒提督張拔萃參將張學詩副將朱廷棟以三營出
白沙峒徑抵紅毛上下兩峒沿途撫納小水峒馮墟峒
暨龍頭七坊薄沙各峒生黎該軍亦以受瘴多病暫撤
四營回南豐調理休息另募土勇更代前進以三營仍
紮白沙紅毛以圖再舉至客匪一項聞大軍渡瓊伏匿
觀望首鼠兩端既不出犯官軍亦不造冊聽候安插遷
延數月始有願就撫遷徙者二百餘人當由馮子材派
員點驗押送渡海交署高廉道王之春分發電白吳川
茂名等縣安置匪首黃鄒保溫河清謫反覆竄匿深

山始終不出經方長華懸賞購緋密派遊擊李渭培千
總胡友勝等深入巢穴設法擒獲搜獲腰間有大元帥
印布一方已將該逆首二名解交馮子材大營訊明正
法其安插客匪沿途潛逃至高州時止二百餘人近日
聞已全行逃歸肆惡如故瓊州紳民向臣籲懇請將該
匪痛懲妥處以免後禍馮子材以諸軍方專力辦黎擬
俟黎事就緒後措置客匪臣現正與該提督電商再行
相機妥辦此方長華一軍擒獲匪首迭撫峒黎之實在
情形也查黎地中東西三路現經分軍勦撫踰險苦戰
歷年積惡之亂黎與近年倡亂之客首相繼誅擒羣黎

震懾紛來求撫請薙髮送丁冊而將士瘴鄉攻勦病歿甚多深爲可憫經馮子材咨請分別獎卹并據方長華稟報前來臣查此次馮子材督率各軍渡海辦黎自當中堅直攻什密數旬之內殲逆破巢旋又親督各軍攻克萬陵各賊寨無數按瓊州緯綫處赤道北十八度至二十度尙在臺灣之南三度距赤道尤近故黎地黎匪與臺灣生番地勢夷情大略相類其地亂山窮谷野樹蔽天雨多晴少不分四時晴午則毒熱雨夜則寒涼溪澗縱橫深一二尺三四尺不等每日須涉水三四道暴漲暴消無橋無船匪徒伏匿其間我軍逐層掃盪而進

行則隊伍難齊臥則支帳無地該逆阻隘拒我以逸待
勞我軍攀險仰攻入生出死雕剿蹂擊終日疲勞較之
內地行軍艱苦十倍而且水土惡劣毒瘴淫雨霧潦水
濕死亡纍纍前者僵仆後者繼進爭先恐後義無反顧
遂能殲渠搗穴大振軍威西路瓊軍不避瘴險深入各
峒迭撫生黎並能生擒漏網首逆黃鄒保等亦足以大
快人心此次攻剿處所皆爲數十年來官弁兵勇未到
之區計嶺門去定安縣已一百九十里嶺門進至什密
又一百八十二里什密距五指山僅九十里廖二弓暨
十八村去陵水縣一百三十餘里儋州至那大一百二

十里那大至元門峒一百八十里皆由提督馮子材志
氣忠壯獎率諸軍親歷奇險愈進愈勇是以將士用命
所向有功現在移軍萬州誓清哮黎現正與臣籌商開
山通道及將來開屯設長興利化俗之策該提督規畫
久遠動中機宜儻能仰藉天威開通羣峒盡化諸黎實
爲治瓊長策所有此次攻克黎巢擒斬首逆疊次獲勝
出力文武員弁合無仰懇天恩俯准由臣查明保奏請
旨優獎以鼓士氣而策全功出自逾格鴻慈其傷亡瘡
故者容俟一併查明奏請敕部議卹

旨覽奏均悉此次進剿黎客各匪連破峒寨殲擒首逆

辦理尙屬得力仍著相機調度勦撫兼施俾臻安輯所有迭次出力員弁准其擇尤保獎以示激勸餘依議欽此

請復拐匪就地正法舊章摺

光緒十二年十二月初七日

竊查同治五年十月二十五日奉上諭瑞麟等奏拐賣人口出洋之奸徒請於審明後卽行正法等語所見甚是此等奸徒以誘拐人口出洋爲漁利之計其情罪甚爲可惡著卽照該督等所擬於審明後爲首斬決爲從絞決由該督撫提勘後卽行正法以挽頽風仍著將決過人犯三箇月彙奏一次以憑查核欽此欽遵行知遵

照在案自此辦理誘拐出洋之案一經獲犯審實立予
駢誅匪徒咸知斂跡嗣於同治十三年前撫臣張兆棟
以略誘出洋之案逐漸稀少請將拐匪照尋常死罪人
犯審解勘題光緒二年七月前督臣劉坤一議覆前督
臣英翰原奏嚴定拐騙人口罪名摺內聲明將審辦誘
拐人口出洋匪犯請仍循例解勘奏准刑部咨覆嗣後
粵省拏獲誘拐人口出洋匪犯被誘之人訊非情甘出
口罪應斬絞立決之案由臬司覆審解勘具題聽候部
覆辦理毋庸先行正法併聲明隨時察看情形如果日
後匪徒膽敢肆行略誘再當奏請從嚴懲辦等因原例

雖未變更辦理遂多周折從此地方官拘泥遷就率以
犯供拐未出洋爲詞曲爲開脫必待起出口供稱拐
賣處所始行按辦以至案懸日久多從寬貸殊不知遠
賣出洋安有起出之日因之將就了結終無嚴辦之期
該匪習見習聞毫無顧忌略賣之風日甚實由於此現
據各州縣稟報拐案幾於無旬無之蓋緣粵地濱海港
汊紛歧香港澳門皆屬洋界法令不及逋逃所歸輪船
麇集隨意可之較之內地難於敗露且賣至外洋之價
較之內地爲豐其賣出口而得慶生還者百無一二
以故罹此害者較他省尤多尤酷夫一人被拐舉室倉

皇其父母或因之輕生其家室或因而離散出洋者受苦工之磨折陷異域而殞生呼籲無門收骨無所冤慘孰甚查匪徒刦奪財物無論有無致斃人命贓數多寡罪皆大辟今拐賣人口者肆行略誘贓數旣多流轉出洋動輒殞命其情節較強盜殺人得財尤爲慘毒而現在辦法尙從常典展轉解勘復需時日實不足以挽救頽風亟宜規復舊章並於就獲審明後不分首從均卽立置重典俾奸徒知所做畏據廣東按察使于蔭霖會同布政使高崇基具詳前來臣詳核例意體察粵省情形此等略賣人口出洋匪徒其出洋漁利無殊於海盜

其傷害人命尤重於刦財竊查本年十二月初三日准
刑部咨定擬南海縣拐婦衛駱氏罪名照強盜律斬決
一案原咨內稱迷拐者以人爲財人已被迷拐走卽屬
得財雖藥未起獲惟經船戶救醒供證實屬確鑿豈得
因其未賣治罪反可輕減等語具見部臣深悉粵省情
形執法懲奸之意雖藥迷之與出洋情事各別而拐賣
之無殊於強盜理有可證該司等現詳各節係屬實在
情形擬請嗣後略誘拐賣之案除立時由內地起出被
拐人口訊明並非圖賣出洋及起獲之人實係情甘出
洋並非略誘者仍照定例辦理外其確有證據實係略

賣出洋而捏稱賣往內地者或狡稱被拐之人情甘出洋毫無憑據及妄指轉賣處所查無蹤跡時逾三月仍未起獲者均暫行照強盜得財律不分首從一律斬決先行正法歸入奏辦各路匪鄉案內就地懲辦彙案奏報如此明定章程庶州縣不至曲爲開脫而匪徒知儆民命保全一俟此風稍息再行體察情形奏明辦理旨著照所請刑部知道欽此

請開鐵禁摺

光緒十二年十二月初七日

竊據兩廣鹽運使王毓藻會同廣東布政使高崇基詳稱各省鐵斤鐵器定例不准下海所以預防移濟洋盜

也海禁既開今昔情形迥異每歲外洋銅鐵入口不下數千萬斤所售槍礮器具不下數百萬件銷銀不止數百萬兩有來無往理殊不平近年來各省講求鑛務率以煤鐵爲大宗粵鐵尤屬精良而銷路不廣卽欲行銷沿海各口陸運脚費旣繁海運又冒法網徒使洋鐵到處流通大利盡爲所奪廣東現設鑛政局鼓舞商民應請將兩廣鐵斤鐵器免禁出洋至出口之處一體照例完納稅釐詳請具奏前來臣查粵鐵出產素饒行銷不廣聽其頓滯一區不惟洋鐵徧行漏卮難塞卽粵鐵盈積私販亦難禁絕徒令鑛法多一窒礙工商少一營生

伏查光緒九年十二月臣在山西巡撫任內會同北洋大臣李鴻章奏請將山西鐵斤准由天津出口轉運各處奉旨著照所請欽此現在晉鐵由津出海轉運奉天省久已欽遵辦理廣東廣西事同一律且廣東現在開辦鑛政該司道等所請援案免禁出洋係爲利民通商起見相應據情奏懇天恩俯准兩廣鐵斤鐵器海運出洋銷售以興鑛務而惠商民

旨著照所請該部知道欽此

查覆收支款目尙無歧誤摺

光緒十二年十二月二十六日

竊准戶部咨議覆臣與前撫臣倪文蔚奏廣東省收支

款目一摺以入款一端與部查數目懸殊令將入款出款查明分晰開單具奏光緒十二年八月初十日具奏奉旨依議欽此抄錄原奏咨行到粵當卽轉行司局欽遵辦理茲據廣東布政使高崇基會同鹽運使王毓藻暨善後釐務各局司道開列清單逐條登覆詳請奏咨前來臣查本年五月內所奏粵省艱窘短絀各節皆係實在情形前單所列收款銀四百五十六萬五千餘兩係約計現年應入之數而部咨謂收款所報數目不確行令查覆查部單所開六百二十七萬五千餘兩係以光緒九年報數爲例年分不同已難一轍其多列之數

則有三端一爲舊管六款併入新收計算溢出銀七十
九萬餘兩一爲續完舊欠十一款歸入常額計算溢出
銀八十萬八千餘兩一爲節扣十一款作爲實銀計算
溢出銀三十萬九千餘兩查舊管本非每年新收似不
能以入款論且從前舊管因積年軍需挪用尙未歸補
其數祇係虛列續完舊欠乃九年分所收遠年舊欠亦
非歲入定額多寡尤難預定是以前單未經列入其節
扣各款或已列入正雜各項之內或因本款並未收足
無從扣存此三款皆係例報之數且多虛列之名未可
作爲現年實數者也其間弛禁藥釐兩項部單亦有重

複誤計之處此外間有參差皆於清單詳晰聲覆其飭查節省支用各款自當另案分別咨覆造報至前奏請緩請減請免之新舊京協各餉部覆仍令照解現經陸續分別籌解奏明在案惟部臣謂廣東出款日增而收款日減致以殷富省分變爲艱窘等語臣待罪巖疆生財無術循繹之下悚愧萬分特是廣東出款之不得已而增收款之有增而無減有不得不陳明於聖主之前者查廣東之累不患入款之少而患出款之多現計光緒十二年一年之中撥解過京協餉并補解帶解抵解各餉共銀一百五十三萬餘兩其中抵解者亦係動支

實銀又清還本省第一二次匯豐洋款本息銀五十萬零三千兩第三四次匯豐洋款息銀二十八萬四千餘兩代還滇桂借用寶源洋款本息銀三十九萬餘兩內除抵解東北邊防尾數約四萬兩抵解舊欠近畿防餉十萬四千餘兩外實還洋款一百零三萬餘兩兩項共計銀二百五十六萬餘兩而本省防餉善後緝盜匪鄉辦黎勘界諸費不與焉綜考同治元年以至光緒十年撥解各餉及清還借款從無如此之多者計前此二十餘年中實解各款少於本年者居多率皆在一百五十萬以下其甚少者則五六十萬至三四十萬第論本

年撥解各餉之數已溢於海防無事之時再加洋款百餘萬其數目浩大實爲粵省從來未有之創聞夫以多事之區承積累之後而支解之鉅如此雖甚富饒豈能不窘此則一由近年海防之急需一由目前部撥之嚴急非粵省所能自主者也至目前善後諸費越已淪敗粵獨當衝邊海俱防綢繆難緩伏讀上年五月初九日諭旨以懲前毖後事過輒忘垂爲大戒宏謨深慮日月不刊此則地勢使然時勢使然必當慎遵籌畫不敢諉諸艱窘而不爲者也加以粵省內河外海之羣盜東西北三江及廉屬之匪鄉瓊州全境搆亂之黎客皆從前

數十年醞釀留遺伏戎貽患以至今茲民庶不安其生
地方將不可問此固非粵省近日新增之事端而微臣
之好爲勞費也若論粵省收款年來力濬財源痛懲糜
費除例收賦課不計近兩年防務倥傯因時籌辦者不
計外自今年起每歲新增之款有現捐巡緝經費約三
十二萬弛禁捐款三十五萬貨釐整頓補抽約較上年
增多十三萬鹽務籌捐善後經費十萬潮州肇慶兩關
增解海防經費五萬以外洋藥包釐於原包數六十萬
之外增加二十萬合計歲增一百一十萬似不得謂之
日減無如以上各項皆係因事添籌各有待用專款無

從抽出移作撥餉之用至例收之款收支原奏曾經聲明丁課正賦厯年無甚出入更無虞其驟減總之洋款自還而撥款不減此殷富之所以變爲艱窘也撥款已多而關繫地方大局利害之事不能不辦此艱窘者之所以愈形艱窘也假使海防善後以及緝盜辦匪平黎諸端概從敷衍彌縫百事俱廢而聽其貽誤於冥漠無形之中未嘗不可歲省鉅金從容支應將來必致外有事而無備內有患而難除即使事過境遷幸而聖上譴責不及而微臣清夜疚心亦無以對朝廷而謝百姓今因部催嚴急已將本年撥款大略應付然而無非挪移

借貸剜肉醫瘡明年本省應辦事宜正未知所以爲計以後如何籌解實無把握前經奏請將實官捐輸展限一年留爲粵用如蒙聖慈俞允或尙可稍濟目前茲再懇切申請無任悚惶待命之至

硃批戶部知道單併發欽此

請編定瓊州鄉會試中額摺

光緒十二年十二月二十六日

竊照瓊州孤懸海外逼近越南情形較臺灣尤爲喫重前經兵部侍郎曾紀澤論奏奉旨飭將黎人設法化導等因當經分飭欽遵次第籌辦在案茲據廣東布政使高崇基按察使于蔭霖詳稱溯查自海防有事以來瓊

州情形最爲緊急歷經奏派文武大員分布防營竭力籌辦並勸諭該處士民捐資團防以爲官軍之助本年以黎客各匪滋事經臣奏明大舉澈辦先清內患仰秉宸謨剿撫兼施數月以來將士用命紳團協力已將歷年構亂之黎酋客首次第殲除現飭各軍深入老山撫黎開道締造經營餉需支絀尤不得不藉資民力爲日方長觀成非易必須紳士倡導氓庶信從始能歷久不懈查瓊州府所屬十三州縣幅員方二千里不少英才績學之人前代名臣通儒如邱濬海瑞諸人史冊輝映國朝乾隆嘉慶年間科第頗多嗣後稍稍不振然如瓊

山文昌定安會同等縣近日文風仍復可觀該府地瘠
士貧府治距省會海陸一千七百餘里所屬南境州縣
距府治又八九百里每逢大比資斧艱難而重躡轔蹶
趨赴省門者甚不爲少徒以遠處海南風氣近樸遊學
不易非無篤志近思之士或少修飾潤色之功與腹地
郡邑合較自不免相形見絀以故近十科以來每科鄉
試大率七八百人至九百餘人往往竟無一人獲雋至
北上春官往返尤屬不易會試中式者數科間得一人
殊無以堅其勵學之心鼓其進取之志查臺灣未經分
省之時向定有會試中額二名鄉試則原編至字號田

字號共四名迭加至七名之多今瓊島孤懸近鄰越海較臺灣尤爲重要應請援案奏請每文武科鄉試編爲玉字號取中三名會試取中一名均由廣東鄉會試中額撥出等情由兼護雷瓊道瓊州府知府謙貴稟經該司等核議會詳請奏前來臣查瓊州地形最爲喫重防海平黎團練捐輸皆資民力而士族單寒登進不易若不亟思培植何以鼓舞人材抑臣尤有慮者方今異學旁流離經畔道所在橫行瓊州爲通商口岸外鄰越境內接澗洲墩民俗傳習素稱詭雜尤賴薦紳儒林蒸蒸日上繼起維持化導庶免鄉愚懵昧見異思遷查鄉會試撥

加中額現有臺灣成案可援今瓊臺地勢略同而海防尤衝寒士尤苦鄉試人數至八九百名不爲不多合無仰懇天恩俯准援案將廣東鄉試民卷中額八十三名內撥出三名編定玉字號每科就瓊州府屬取中三名會試人數在十名以上懇恩於廣東中額撥出一名取中若不及十名臨時無庸請旨以示限制其武鄉試會試亦擬請照文闈名數編定中額如蒙俞允卽自光緒十四年鄉試十五年會試爲始庶邊士登進有階益勵敵愾同仇之氣愚民詩書被澤不爲異端邪說之歸感戴皇仁曷其有極

硃批禮部議奏欽此

薦舉州縣人才摺

光緒十二年十二月二十七日

竊惟廣東吏治頹敝甚於各省歷年以來多方整飭參撤不少然吏有劾無舉亦無以發人興起之思而端其趨向之準臣督同廣東布政使高崇基按察使于蔭霖詳加甄選大要以心地爲本操守爲先而復覘其才具考其成效查有現署新會縣准補高要縣知縣包永昌清剛樸訥皎然不欺抵任兩月之間訊結羈犯八十餘名結案百餘起平反盜犯五起前在萬州署任親率團練捍禦黎匪境內乂安至今民頌其德無愧惴惴無華

之目現署香山縣優貢分發知縣張文翰明決勤能遇事敢任歷任劇縣皆有政聲到任以來獲著匪五十餘名訊明前任積盜百餘起措置繁難迎刃而解輿情翕服人樂爲用可謂濟事應變之才現署欽州試用知州李受彤廉潔精細條理詳明委查事件不蹈瞻徇之習其在署任殲除地方積匪多起興學化俗百廢俱舉頌聲卓然洵屬爲守兼優之選現署澄邁縣試用知縣楊蔭廷樸質少文貧不易操上年冬間客匪滋事募勇禦賊多所保全審理案件下鄉履勘絲毫不累民間前在署文昌縣任內革除傳呈陋習捐修便民所以處候審

者親查速判書役不能索擾去任時父老遮道請留至
今民猶思之署連平州知州優貢分發知縣徐多珍處
瘠能廉審斷明慎緝盜有方籌辦倉穀著有成效所謂
日計不足月計有餘者庶幾近之署開平縣補用知縣
溫樹棻操守可信才識老練委辦要案卓有操縱可以
理煩治劇以上六員才守治績均有可觀雖才性各有
不同要皆有盡心民事之實際無俗吏油滑浮靡之積
習在粵省州縣中均屬出色之官似應上達朝廷以風
羣吏據該兩司會詳請奏前來理合據實上聞合無仰
懇天恩俯將該員等予以嘉勉不獨該員等益當感奮

期造循良庶通省牧令皆有所感發興起於吏治大有裨益

硃批另有旨欽此

購辦機器試鑄制錢摺

光緒十三年正月二十四日

竊惟粵省制錢自咸豐七年以後三十年來未嘗開鑄官錢日乏商民病之臣比年以來久欲整頓圖法惟舊例辦法虧耗過多限於物力未能舉辦上年與廣東布政使高崇基詳籌熟商博采眾議惟用機器製造則錢精而費不鉅當經電致出使英德各國大臣考究機器價值及鑄造之法疊接使英大臣劉瑞芬函電喜敦廠

機器全副每日作工十點鐘能鑄造銅錢二百七十萬箇並寄來喜敦廠機器價目廠屋圖式計上等機器全副內參大號造銀元機器四架另鐫刻銅錢文母模一副子模十副鑄造銀元母模四副子模八副製造鋼模所用之鋼料隨時購辦合計機器鋼模外加運腳保險以鎊價折合約需銀二十五萬餘兩建造廠屋佔地縱橫六十丈地面須布鐵板墊洋泥除地基外工料約需銀五萬餘兩粵省城內民戶稠密地基過昂約需銀數萬兩不得以爲常例此外常年所需鎔銅鎔銀洋製泥罐每月約需銀二千六百兩鑄銅鑄銀鋼模鋼料每月

約需銀一千零八十兩鍋爐烘銅片所用上煤枯煤栗
煤每月約需銀三千兩洋匠四名薪工每月約需銀八
百六十兩匠夫三百餘名以及員役薪工挑運雜貨每
月約需銀二千四百兩綜計一切每年約需銀十二萬
兩原議機器一年半造成三批運送首批七箇月到每
日可造銅錢四十萬箇次批又五箇月到每日可添造
銅錢五十萬箇并銀元十萬圓三批又六箇月到齊每
日可共造銅錢二百六十萬箇銀元十萬圓總計仍符
每日鑄錢二百七十萬箇之數每月可造銅錢七萬八
千緡銀元三百萬圓通年約停工三十日除搭鑄銀元

數百萬圓外約得銅錢九十萬緡查銅鉛配合之劑銅質若少卽不能受機器軋力應以紫銅六成白鉛四成爲率考錢法輕重歷代多以唐初之開通元寶爲準其制重今庫平一錢蓋古之稱物皆以銖兩計後世十錢爲兩之名卽由開通錢而得宋太宗時太平通寶眞宗時咸平元寶景德元寶重皆如之我朝順治十年以前所鑄卽重一錢康熙十九年 聖祖仁皇帝諭令一文重一錢誠以輕重適中名實相稱此制最爲經久今擬卽鑄此式每一文重庫平一錢並擬於錢文背面上下鑄庫平一錢四字以杜私鑄合計每千重庫平六斤四

兩粵省錢價一千五百文值銀一兩今暫以香港上等洋銅洋鉛時價合計銅鉛價本暨物料工費火耗與鑄成所值銀數大率相等不致虧折機器所鑄輪廓光潔字體精好私爐斷難相混鑄成後或發商易銀或購買官物或搭放餉項按照市價臨時酌量務順羣情不限定搭放成數亦不預定折合銀數以免軍民受累竊惟上古鑄幣本意開山澤之鑛鑄通行之貨固以利民卽以富國今以外洋銅鉛充鑄祇屬一時權宜緣洋船銅鉛煉精耗少易受模範港去粵近價值亦平滇銅黔鉛所產至富而提煉未淨價脚過昂目前難資應用查西

南諸省多產五金此乃天地儲此無盡之藏以供國家
邊防之用今日爲西南實邊計莫如大興鑛務就近鼓
鑄一端然非下手試辦參考贏虧并變通采煉鼓鑄轉
運之法其事必不能舉天下事每憚於勞費而創始故
臣願以粵省創之茲擬并用內地銅鉛搭鑄并行其式
樣配料輕重一切相同用以較其精粗核其息耗粵省
一面試辦一面與雲貴總督臣考核銅鉛價脚由兩省
自行講求開采鎔鍊之法如半年以後核計粵鑄無虧
則就近滇黔開鑄節省必多查貴州威甯州一帶爲產
鉛之所亦兼出銅黔省近年卽於該州設局鼓鑄以取

利便惟山路阻遠機器難至考黔鉛運道向由威甯陸
運十站至永甯縣水運三站至四川瀘州委員於此設
局轉運滇銅產雲南東川府與威甯鄰境滇銅運道亦
由威甯東下瀘州亦於瀘州設局轉運是四川瀘州實
爲滇黔銅鉛會集之所而去該兩省又甚近瀘州濱江
富庶商賈輻湊爲川南綰轂之區若由川滇黔三省合
力集資購置機器一副溯江至瀘建一大廠滇銅黔鉛
并四川本省之銅俱就此局鑄造三省自行籌商酌劑
每年各鑄錢若干緡計兩副機器歲可出錢一百八十
萬緡浮江而下達於沿海上海神京旁濟吳楚制錢通

暢而滇黔已受無窮之益矣如此則鑛商鼓舞開采日
蕃價值漸減鎔煉漸精卽專用內地銅鉛鼓鑄不致虧
折廣東及他省所需更無須取給外洋庶爲經久之道
行之大效更可於漢口設機鑄造以期四達旁流以京
師及各直省之銀易川滇黔三省之錢自相灌輸大利
仍在中國似於京外民用邊餉邊民均有裨益但目前
粵鑄兼用中外銅鉛虧折過鉅力有不支惟有搭鑄銀
元或有餘息藉資彌補庶免以虧耗牽掣致阻圖法其
試鑄銀元辦法另片詳陳至此項購器造廠之費需銀
三十餘萬兩粵省庫款支絀無可撥動現經與弛禁商

人酌款令其代向富商挪借此數應用將來陸續由外
籌還不動正款俟機器到粵開鑄三箇月後當將各項
工費商民行用確實情形詳晰奏聞據該藩司高崇基
具詳前來除已電致出使大臣劉瑞芬立約購運飭縣
委員購地建廠外理合恭摺奏陳伏祈聖鑒
硃批戶部速議具奏片併發欽此

試鑄銀元片

光緒十三年正月二十四日

再廣東華洋交錯通省皆用外洋銀錢波及廣西至於
閩臺浙江皖鄂煙臺天津所有通商口岸以及湖南長
沙湘潭四川打箭鑪前後藏無不通行以致利歸外洋

漏卮無底竊惟鑄幣便民乃國家自有之權利銅錢銀錢理無二致皆應我行我法方爲得體且粵省所用洋銀皆係舊洋爛板破碎黴黑尤爲隱受其虧粵省此次訂購鑄錢機器內兼有鑄銀元機器擬卽選募西人善鑄銀元者來華試造若附在錢局內鑄造計此歲鑄銀元三千萬枚之機器其機器價值廠屋工料火耗一年所費不過四五萬金專設一廠亦不過十餘萬金外洋銀元每元重漕平七錢三分今擬每元加重一分五釐有奇定爲庫平七錢三分銀元上一面鑄光緒元寶四字清文漢文合璧一面鑄蟠龍文周圍鑄廣東省造庫

平七錢三分十字兼用漢文洋文以便與外洋交易鑄成之後支放各種餉需官項與徵收釐捐鹽課雜稅及粵省洋關稅項向收洋銀者均與洋銀一同行用不拘成數銀色務與外國上等洋銀相等銀質較重而作價補水均與相同商民趨利自易風行若日久通行民間自行加價亦聽其便聞外洋銀元頗有贏餘雖每元加重一分五釐斷無虧折如蒙允行懇請頒發明旨鑄銀元除京餉外各省協餉解款完納華洋釐稅民間交易准其一體行用開鑄時卽當將銀樣恭呈御覽試造之初先鑄一百萬元察其能否流通陸續添鑄多至五

百萬元而止如不能暢行隨時停鑄殊不爲難卽略有虧耗亦甚微渺可以預決當由粵省籌補不動庫款一年以後粵省果能暢行當將工費細目贏餘實數詳晰奏咨屆時擬請敕下戶部體察酌劑由部購置機器一副在天津設局鑄造頒發通商口岸一體通行粵省銀元仍懇准其鑄造由戶部酌定限制歲鑄若干如有息款卽以彌補鑄錢虧耗計戶部機器一副日鑄十萬元歲可鑄三千餘萬元卽以每歲鑄千萬元計之數年之後充牣海邦流通域外雖不藉以裕國用亦足以保利權粵省試其端而戶部權其利揆時度勢似尙無所窒

礙總之鑛務錢法銀元三事相爲表裏交互補益如環無端鑛產盛而後鑄銅鑄銀有取資鼓鑄多而後西南各省銅鉛有銷路以鑄銀之息補鑄銅之耗而後錢法可以專用內地銅鉛而無虞虧折迨至開采日多銅價日賤官鑄無虧商趨其利民便其用邊軍資其餉實西南徼外之邊備塞東南沿海沿江九省之漏卮未必非自強之一端也所有粵省擬請試鑄銀元以備戶部推廣各緣由相應附片具奏請旨敕下戶部速議覈覆施行

勦撫各黎開通山路摺

光緒十三年二月十七日

竊查瓊州黎匪自攻克陳鍾明什密老巢平燬馬嶺廖
二弓十八村匪寨後軍威已振西峒逆首陳文中馬嶺
逆首黃清廖二弓逆首那肥卽胡那肥那閃陵水逆首
丁鬚生藍紅衫胡明時樂會逆首賴文成等負隅抗拒
死黨尙多又有僞大將軍鄭顯昌係光緒七年閏七月
奉旨飭拏未獲之逆首瓊民多罹其害均應亟爲剿辦
以伸國法而快人心當經提督馮子材派直隸州知州
劉保林督率部勇剿辦那肥一股道員楊玉書知府馮
相榮率軍追剿陳文中黃清各匪分飭紳團搜捕餘孽
上年十一月二十七日探知那肥踞廖二弓老巢濠深

巖密上列礮石爲死守計劉保林派隊進攻先燬堅木
柵十餘層該逆猶抵死不退二十八日我軍直逼老巢
以火箭飛射寨中知縣石佩瓊主簿楊士丞巡檢楊桂
振等繞出山後圍攻自辰至午賊勢不支棄巢向後山
越竄石佩瓊督勇猛追那肥中槍倒地經楊桂振割取
首級逆黨回援楊士丞猝爲飛彈所中登時陣亡各軍
四面兜擊殄斃悍賊百餘名奪獲槍械三百餘件陣亡
勇丁九名受傷三十餘名生擒匪供那肥槍斃屬實餘
匪逸出無幾維時陳文中竄入陵水首弓之打鐵村十
二月初一日楊玉書馮相榮暨團紳譚喬紳分帶兵練

馳往圍捕該逆奪門狂竄練長林明志奮勇持鬬槍斃
逆首陳文中練長吳金章生擒僞先鋒胡那耀並斃匪
夥多名初七日楊玉書馮相榮劉保林移營廖二嶺尾
逆首那閃率黨出柵拒戰猛鷲異常我軍合力圍攻礮
傷該逆左脚始經就擒解交馮子材大營訊明梟示連
日各軍勦捕搜山丁鬚生藍紅衫胡明時三逆以次就
擒總兵林長福率萃右軍搜勦烏坡一帶餘匪初一至
初五等日將橫山固賊黨一併攻燬生擒賴金昌王打
狂等匪殲斃逆黨數十名我軍亦有傷亡知府馮相華
率萃中軍分搜定安望天嶺天峒嶺一帶擒斬逆匪賴

文才夥黨黃亞二等九十餘名萃右軍擒獲逆首賴文成暨匪黨胡鳳尾等八十餘名劉保林所部萃左軍擒獲黃昌明等一百餘名萃前軍擒獲林成珍等一百八十餘名均係積年黨匪供認迭次殺掠不諱經馮子材先後飭令正法東中兩路匪勢已經渙散惟鄭顯昌黃清末獲十二月二十一日偵知鄭顯昌率其死黨盤踞萬州黎峒馮子材飭署萬州營遊擊方敬選派弁兵會合萃軍馳往圍捕千總張德星五品軍功朱廷光首先奮勇深入黎巢將該逆生擒解營正法本年正月十二日馮子材自赴寶停司督勦令馮相榮劉保林分率勇

團搜山是夜躡及黃清於廖二弓灣洲地方都司陳榮
坤守備劉步高連槍擊斃之令降黎認明屬實並將平
日濟匪致富被控多案之土棍李榮誥拏獲正法合縣
稱快當萃軍漸移瓊南之時中路定樂毗連之嶺門烏
坡一帶尙有餘匪當經臣之洞由省另派福軍四營益
以上勇兩營前往搜勦撫定其西路客匪黃鄒保溫河
清夥黨前次雖經投誠渡海安插仍復潛回故地伺便
糾眾劫掠怙惡不悛法難寬宥經道員方長華派軍擒
斬匪首陳贊桂匪目張秀生鄧亞生賴官生等四十三
名稍輕者分別發交州縣懲禁保釋仍飭該處紳團勒

拏餘匪以期安緝又有儋州匪首陳鍾銘藉報復爲名糾眾滋擾感恩地方焚殺淫掠黎漢各村均被其害上年八月奏明在案方長華派府經歷毓濂等設法擒獲交馮子材大營訊辦以上情形接據馮子材暨方長華楊玉書護雷瓊道謙貴等節次咨報稟報前來計定樂陵萬澄感各匪俱已漸次廓清惟崖州一屬處瓊郡之極南距府城將及千里山谷最深瘴毒最重從古人跡未到之處該處生歧最悍自道光九年至十一年戕官爲亂經前督臣李鴻賓督軍勦平卒以官兵未能深入草林嶺以北黎村自此叛爲生黎不納丁糧抱寨抱丑

打蕩等村黎匪四出焚殺甚慘紳民屢經稟請勦辦又
陵崖交界之下馬峒在五指七指之間地勢深險素爲
匪窟此兩處尤應乘機勘定此時將士久勞饋餉不易
然不就此兵威一律底定則瓊地病根未除聲教終梗
以後難期再舉臣之洞熟加籌度亟宜恪遵一勞永逸
之諭廓清崖境以竟全功當經與馮子材電函定議激
勵諸軍多備醫藥移師南路病者撤出善地調養壯者
鼓勇深入令馮相榮馮相華劉保林等三軍由東路進
方長華之軍由西路進會合紳團分別勦撫務令直抵
生歧巢穴應俟辦有端倪再行奏報此萬陵各匪肅清

後現又移辦崖匪之實在情形也現在亂黎漸稀則撫定良黎有可措手臣之洞酌擬撫黎章程十二條刊發傳布一官軍此舉專爲勦除亂黎招撫良黎開通十字大路以期黎漢永遠相安其良黎秋毫不擾毋庸畏懼一從前爲匪黎人投誠者免抗拒者誅擒斬來獻者重賞一投誠各黎無論生熟一律薙髮改裝一投誠黎首開送戶口冊細獻匪徒繳呈槍械一投誠黎眾隨大軍伐木開山必驅嚮導仍按計里數酌給賞犒一將來開通生黎大路後選擇要地設官撫治安營彈壓各村黎長助勦開路有功者授爲土目就中酌設局總土目數

人散目給頂戴總目授土職自爲約束仍聽地方官選
黜略仿黔滇各省土司之例不令吏胥索擾一開通後
黎人仍安生理有主之田斷不能強奪惟抗拒者籍產
入官充官軍屯田之用一開通田業三年內不收賦稅
三年之外務從輕則起徵斷不科斂一開通後黎境有
鑛各山由官商開采者給錢租賃絕不强行佔踞黎漢
均享其利一開通後民人鹽布百貨與黎地牛木糧藥
等物在各峒口設場互市來往暢通公平交易嚴禁漢
民訛賴盤剝總令於黎人有益一設立土目之後應各
具永遠不敢殺掠抗官藏匿匪徒之切結存案所屬有

犯責成該土目拏送到官按律懲辦一每數村仿內地
設一義學延請塾師習學漢語漢文宣講聖諭廣訓所
需經費就地籌辦令在籍紳士總兵林宜華副將符鴻
升等分遣通曉黎語團紳經歷各峒剴切宣諭其霞黎
苗黎哮黎乾脚歧各種類多裸處酌給衣袴令其漸被
冠裳之化馴其頑悍之俗現據各路稟報已經薙髮改
裝就撫造冊者東路丁口三萬餘北路一萬餘西路四
萬餘查撫黎以開路爲先開鑿險隘芟焚林莽令其四
通八達陽光照臨人氣日甚則嵐嶂自消水毒自除前
代雖有開通十字路之議迄未舉行康熙二十年瓊州

鎮總兵吳啟爵勦南勞峒黎後亦會議及中作而輟綜
考黎峒形勢北以十萬峒之牛欄坪爲要東以太平峒
之什密爲要東南以寶停司爲要南以羅活峒之安司
爲要西南以古振州峒爲要西以紅毛峒之凡陽爲要
皆出入衝要可以屯兵足食之所茲擬開大路十二道
一由樂會之嘉瀆市西行經石壁船埠加嶺中平河濫
出五指山之北西抵牛欄坪此爲東北路一由萬州之
興隆五甲西北行經長沙營什密禁會南峒七邨出五
指山之東亦抵牛欄坪一由定安之銅甲口西北行過
毛祥口出五指山之南西抵五指山下水滿峒一由陵

水之烏牙開至寶停司又由崖州之藤橋亦開至寶停司再由寶停司西行橫開一路越七指山抵崖州屬樂司此爲東三路均責成道員楊玉書辦理一由崖州東之三亞口西北行越華林大嶺出五指山之西抵凡陽此爲東南路責成道員楊玉書暨知府馮相榮馮相華辦理一由儋州南豐市東行經大水番崙元門紅毛合棘諸峒東南抵五指山水滿峒一由紅毛峒南行經番響毛匱諸峒出五指山之西北經凡陽南抵樂安司一由儋州之調南市東南行經七坊刀缸諸峒南抵感恩古振州峒北爲西三路一由昌化東行經古振州峒

東亦抵樂安司此爲西南路均責成道員方長華辦理
一由崖州西之九所市北行經樂平汛東北抵樂安司
此爲南路責成署崖州知州劉保林署崖州協副將方
敬會合方長華辦理一由定安之嶺門南行經蟒蛇峒
十萬峒牛欄坪南勞峒抵五指山過山南至水滿峒此
爲北路一由嶺門西南行經三坎溪豬母灣加釵峒出
黎母山之南抵紅毛峒此爲西北路責成督帶福軍同
知孫鴻勳辦理統由馮子材考核督催並飭瓊州道府
激勵各屬紳團同力協助大率參考前明海瑞俞大猷
諸人之說加以變通推廣所開之路如井字形其餘各

州縣團夫分開小路以合於大路縱橫貫通同時並舉
分地定限會合聯接勇團土黎併力作工以一丈六尺
爲度極險仄處以八尺爲度人力所不能施者以炸藥
轟裂之所到之處伐木焚莽搭橋鑿井經過黎歧隨宜
撫定分遣員生測繪地圖並令沿途察看各河道是否
可行船筏以備運出老山材木百貨測看各山鑛苗種
類以備開采山內地形土性宜於種植何物以阜物產
而贍瓊民路通地闢之後應於內山要隘廣饒處所建
置城寨設官安營以資化導控制舉辦一切俾此奧區
永爲樂土竊惟瓊郡唐代建州置縣以來峒黎叛服不

時屢煩兵力良由山深林密恃險爲患外匪附和荼毒
益深勞費防守直無安歲與臺灣生番情形無異乃蒙
聖主明見萬里采兵部侍郎曾紀澤之奏特頒諭旨令
籌經久之計臣等仰秉宸謨策勵諸將稔惡亂黎誅擒
殆盡開荒鑿險漸化榛狉目前路工已得十分之四統
計五月間路工可一律告成羣黎亦可撫定一切善後
事宜臣等當妥議奏陳所有疊次攻克萬陵等處匪巢
殲除首要以及深入老山撫黎開路各員弁艱險勞瘁
迥異尋常應懇恩施由臣等存記俟全瓊肅清後彙案
奏請獎敘

硃批覽奏均悉卽著張之洞等將勦撫各事宜妥籌辦理以靖地方所有出力各員并著俟全瓊肅清後准其擇尤彙案奏保毋許冒濫欽此

張文襄公全集卷十九終

紹興孫家棟校

張文襄公全集卷二十

奏議二十

恭報交卸兼署撫篆日期並懇賞假調理摺

光緒十三年

年二月十七日

竊照新任廣東撫臣吳大澂現已抵粵臣當將廣東巡撫關防及太平橋監督關防並王命旗牌文卷等件於光緒十三年二月初九日委員齎送撫臣接收臣卽日交卸署任伏念臣當兼權撫篆之日正勉銷病假之時孱軀本未復元而吏治軍政餉需盜案洋務邊情兩衙門公事一時並集尤無喘息之暇誠以委畀之厚時事

之艱不敢不勉策疲驚獨自措挂現在署任雖獲交卸而本任職守繁重依然幸同官有人可資商榷亟擬趁此調養宿疴兼因感受春寒觸動肝木舊證鬱塞作痛醫者謂病原在於用心太苦有乖消息之宜必須息心靜養非藥餌所能驟效惟有籲懇天恩賞假一月俾得調理速痊勉圖報效至日行緊要事件臣仍當力疾會商東西撫臣妥爲辦理

硃批著賞假一月欽此

添調福軍赴瓊片

光緒十三年二月十七日

再上年十月萃軍攻克什密老巢後因冒瘴苦戰兼以

不服水土病歿纍纍當將各營撤出嶺門調息傷病將士分軍由屯昌進紮陵萬專勦馬嶺廖二弓等處股匪業經奏報在案查自萃軍撤退後中路無勁兵填紮在瓊各軍皆未堪此瘴癘正擬添調生力兵勇以代疲病而竟全功適記名提督南澳鎮總兵劉永福請假回廣西賓州安置家屬並往博白縣省墓所部福軍五營尙留省城該軍將士以入關後未立功效自願赴瓊助萃軍勦撫黎匪當查該軍久在關外素習艱苦能忍煙瘴到彼如果相宜將來卽令在彼墾田開鑛既可節省軍儲安插人衆瓊防添此一枝勁旅更有大益卽經檄飭

前委經理該軍營務之同知孫鴻勳選帶四營前往由中路進并於到瓊後添募土勇兩營以資響導每營二百人仍隸福軍編爲福軍新左新右營以便鈐束劉永福銷假回東後仍留省防俟將來體察情形若亦令該提督赴瓊是否相宜再行奏明請旨辦理現在該軍悉遵孫鴻勳調度渡瓊以後秋毫無擾於撫黎開山諸事甚爲得力

硃批知道了欽此

爲張福啟等請卹片

光緒十三年二月十七日

再遊擊銜廣東儘先補用都司張福啟自馮子材渡海

勦辦黎匪該都司踴躍請行首率一營由嶺門深入黎
峒爲諸軍先雙溪灘黃竹等處賊寨爲陳鍾明什密老
巢第一重門戶巖深河廣該都司鳧水而渡麾軍猛攻
首克堅柵三處旋復冒雨會合諸軍攻奪總口山要隘
大挫凶鋒是此次殲渠掃穴該都司尤爲首功詎以日
日渡河冒雨受溼兼受瘴氣水毒致嬰重病歿於營次
各軍同聲痛惜計該營弁勇傷亡瘴故最多又查有六
品銜分省補用縣主簿楊士丞向在萃軍派充哨官上
年十月隨同大軍攻克什密老巢復經攻勦廖二弓黃
清匪巢斬馘最多均經奏報在案此次進勦廖二岩那

肥一股該主簿力追該逆中槍陣亡該逆及其悍黨率
爲我軍所殲查張福啟首克黎巢殞身瘴域楊士丞以
文吏親身搏戰奮勇捐軀均屬深堪閔惜合無仰懇天
恩俯准敕部將遊擊銜儘先都司張福啟照遊擊軍營
立功後積勞病故例從優議卹六品銜分省主簿楊士
丞照六品陣亡例從優議卹以慰忠魂其餘疊次傷亡
瘴故員弁兵勇容俟查明另行彙案奏請賜卹
硃批著照所請該部知道欽此

京員津貼請仍照原派數目籌解摺

光緒十三年三月十七日

竊惟我朝優待臣工京官於正俸外復有恩俸而外任

復益以養廉銀尤爲前代所未有光緒九年間戶部因言官條奏議令各省關提撥外銷之款作爲京官津貼計每年擬解京官津貼銀二十六萬兩會同吏部酌定章程於十年間奏准各衙門四品以下京官翰詹科道及內閣各部院侍讀郎中員外郎主事中書小京官等官每年各按三百兩二百四十兩一百六十兩一百兩數目開放在案各署京員同聲感戴無不益思磨勵冀以仰答生成至十一年十二月間戶部以在京官員放給全數俸銀奏明停止津貼各省關仍將原撥津貼之款解部搭放俸餉在部臣自以增餉繁鉅派撥爲難故

不得已而出此特是俸銀津貼莫非聖恩名實固不必區分而贏絀實不能無異查京員四品以下歲俸一百五兩至四十五兩有差此次議給全俸不過補足近年減成之數並非全數新增近時物力之貴日用之昂迥非往昔可比且員數踰濟銓補需時竊惟澹泊所以明志乃儒臣守道之本懷而爲學必先治生亦先儒探源之要論京朝諸臣直禁近之地處清要之班氣節學術關繫國家元氣似仍宜曲加體恤用示激揚惟軍實官常必須兼籌無礙伏查各省海防糈平用度漸簡疆吏權使無不恪遵訓諭精心綜核力戒浮糜如各省關再

將內銷外銷各用款分別設法節省計每年所籌自數千金至二三萬金不等尙不至無從措手似可卽照戶部奏准搭放俸餉二十六萬兩之數令各省關各按原數力籌另解關繫神京要需斷不至推諉貽誤至京員津貼仍照原案籌解卽仍照原案支給但稍資眾擎之力實大助六計之廉臣等承乏粵疆當此度支困絀外銷日少初何敢建議擴充惟省關分籌尙不甚多誠仰見聖主體恤羣工旣已澤霈非常允宜循行不替合無籲懇天恩俯念京秩清約係屬實情除遵旨放給全俸外伏請敕下戶部核議可否令各省關卽照此次部

議將津貼改爲搭放俸餉之二十六萬兩仍按原省原數另籌解部作爲搭放俸餉專款其原派京員津貼一款照舊籌解戶部仍照原議之數分給似於贍軍養廉兩無滯礙省關諸臣仰體聖慈度有同心而朝廷惠養在其中臺閣儲器亦在其中裨益良非淺鮮
硃批現在京員已給全俸自毋庸另予津貼該督等所奏意存見好著不准行欽此

詳陳澳界利害立約尙宜緩定摺

光緒十三年四月二十四日

竊臣於光緒十三年三月二十四日承准總理衙門咨稱洋藥稅釐併徵新章香港與澳門會辦各節於光緒

十三年二月十三日奏奉硃批依議欽此恭錄咨行到
粵查原奏內稱竊查洋藥自印度販運來華聚於香港
澳門分赴各口銷售必須英葡兩國相助稽查方可杜
偷漏繞越之弊上年正月間奏請飭派道員邵友濂會
同總稅務司赫德前往香港與英官會商辦法查知港
地雖爲握要尙須與澳門會辦始能得力澳門自前明
嘉靖時卽經葡國佔居歲輸租課二萬金迨至國初知
該處被佔已久難以收回遂改稅課爲地租僅令輸銀
五百兩按年完繳自道光二十九年以後并此項銀兩
亦未交納近年該國屢求訂約通商因澳門之事爭論

未定輒作罷論刻下因洋藥稅釐併徵一案非與葡國商辦則澳門之偷漏無從巡緝是以十二月間開辦併徵之後卽密飭赫德派稅務司金登幹就近前往葡國徐圖辦法茲據赫德申稱現已准葡國外部電信一派使來華擬議通商條約二葡國永駐澳門管理一切三葡國不得讓其地於他國四香港所允辦法澳門亦類推辦理以上四層現值香澳稅務開辦在卽卽由金登幹在彼畫押爲據一面照會英國使臣轉致葡國派使來華議約并飭知澳門洋官卽照所議開辦各等語查澳門久爲彼國盤踞今縱不准其永遠居住亦屬虛文

又徒於稅務多添窒礙并無收回該地之實際儻能議約有成則權有專歸稅務可期無缺向之偷漏稅課者今可設關向之招納叛亡者今可緝匪向之拐騙丁口者今可安插稽查而且與新加坡等埠鄰近藉可通達消息尤爲得力再查葡國貧困日甚如法美俄德各國皆有財力無不垂涎澳門冀以巨款購得其地爲駐兵之所是不讓其地於他國一層尤應於議約之先切實聲明杜絕覬覦所議各節似宜照行請旨飭下兩廣督臣遵辦并札飭總稅務司飭金登幹先行畫押至同治年間原定未換條約各款今昔情形不同所有應增應

刪各節應候該國使臣至華詳細核議隨時另行請旨
辦理等語臣惟葡人僑居澳門歷有年所總署因其久
假不歸且慮他國垂涎陽資其權稅緝奸之力陰禁其
併吞授受之謀原所以曲示羈縻裨益國計所以臣初
見港報尙覺將信將疑未幾接到總署來文方知成謀
已定迫灼徬徨不可言喻頻月以來通籌利害竊恐羈
縻之意雖善滋長之患方多茲事體大有不得不瀝陳
於 聖主之前者查澳門爲香山縣管轄距省城二百
餘里陸路可通實爲廣東濱海門戶非如瓊州之孤懸
海外亦非如香港之矗立海中葡人雖盤踞多年不交

租銀不守界址然亦幸中國之不屑與較至絜權量力
我之可以逼葡萄葡之不足病我事理甚明今因事要求
曲徇其請遷就立約在葡人固始願不及卽他國亦相
顧驚疑夫因練軍而始籌餉乃因籌餉而先損權可慮
一也葡之住澳本以圍牆爲界牆外民田戶籍悉隸香
山管轄葡人逐漸越佔又屢向界外村民勒收田房租
鈔迭據望廈村紳民聯稟赴懇經臣先後委員會勘照
會葡官查禁在案名爲租界猶得加以詰問立其隄防
若竟畀以管理一切之權將此後土地人民盡歸葡屬
以後水界附島皆將視若固有是其政令旣行於澳中

管轄將及於澳外界限混淆潛滋暗長可慮二也中國
濱海各省租界林立一切管轄辦案權利章程幸有公
法可循條約可守雖暫無退還之舉亦莫生覬覦之心
今有澳門爲例則日後諸強國乘機伺便接踵效尤拒
之則有厚薄之嫌應之則成滋蔓之勢且此次英葡同
一幫緝英人倡議主事德色尤深葡則成效未見已有
先施英若美利能收能無厚報可慮三也粵民僑寓澳
門人數眾多良莠互異南番香順等縣商民往來省澳
者何止數萬往往兩地置產兩地行商無從限斷至於
閒民濫匪往來如織尤無紀極西例凡生長於某國之

地卽可隸籍爲某國之民領取票據恃爲護身之符遇有犯事地方官不能以華法治之卽如光緒十一年南海縣民何回生走私一案何回生現隸民籍家有職官人所共知乃英領事來文以其久居香港冒入英籍公然據爲英國屬民前車可鑒查英國稽核較嚴猶不能無冒濫給票之弊葡國貪鄙陋劣若以澳門歸其管轄奸民將取巧冒籍四出作奸葡國必漁利扛幫紛紛移索民無定籍官法不行可慮四也澳門藪盜庇奸由來已久臣到任後所有照會葡官提究要犯雖不無往返駁詰亦均陸續交出以視港官之扣留員弁勒請訟師

糜費曠日或交或否聽憑洋官辦理往往始終不交者
難易較殊租界與屬地辦法不同確有明驗今若改歸
管轄以後不獨拐騙人口難於過問卽緝匪一節亦將
藉口洋例如香港之節節刁難彼之事權愈專我之隔
閼愈甚可慮五也葡踞澳門得之無名未立條約利益
不能與各國同霑葡人犯事可歸地方官審辦通商以
來未聞有葡人遊歷傳教之事彼非不願來實不便來
也今若與立約必有遊歷傳教之條彼族將藉此爲營
私之計將來交涉教案必有歐洲各國之人所不屑爲
者葡人則優爲之可慮六也葡人貧困日甚各國垂涎

澳門誠如總署所云冀以巨款購得爲駐兵之所然名爲租界環瀛共知猶未敢公然取求顯干名義今改爲葡轄我縱能禁葡人之不得轉讓豈能保各國之不以力爭設竟效併吞緬之故智不取之於我而取之於葡葡人爲自主之國而無可求援中國爲局外之觀而無從庇護澳門雖蕞爾逼近省垣此後水陸籌防均難措手實爲肘腋之患非獨唇齒之憂可慮七也有此數弊雖併徵得效利害兼權似亦不能無鯁鯁之過慮特是草約已立勢難中止微臣愚陋竊思今日挽回補救之策約有五條一曰細訂詳約查簡約雖經金登幹畫

押而詳細條約應刪應增仍須俟葡使到華會同總署核議請旨辦理其永駐澳門一條原因協辦藥徵格外見讓租銀非畫地歸葡者可比且約有不得轉讓他國之文可見澳門係中國讓與葡國居住仍係中國疆土應聲明讓與葡國永遠居住免其租銀不得視爲葡國屬地其不讓地於他國一條應聲明澳門仍係中國疆土葡國不得讓於他國如此則我有讓地之名而無損權之實仍與原約之義毫不相背既可關葡人之口亦不至生他國之心一日畫清界限有陸界有水界何謂陸界東北枕山西南濱海是爲澳門其原立之三巴門

水坑門新開門舊址具在志乘可徵所築礮臺馬路兵房均屬格外侵佔應於立約時堅持圍牆爲界不使尺寸有踰彼所重在租界界外之地本屬可有可無我讓則彼取我爭則彼棄斷不至因此遂廢前議何謂水界公法載地主有管轄水界之權以礮子能及之處爲止兩國土地毗連中隔小河則以中流爲界此係指各國自有之地及征伐所得者而言澳門本係中國之地不過准其永遠居住葡人只能管轄所住之地宜明立條款所有水道准其船隻往來不得援引公法兼管水界一曰界由外定准葡住澳免其租銀水界仍是中國所

有自無水界之可分陸界至舊有圍牆爲止葡人於同
治初年將圍牆拆卸希圖滅跡然牆可拆而舊址終不
可沒將來約有成議似應由粵省督撫臣就近派員會
同葡使親往勘驗詳查舊址公同立界俾免影射踰越
一曰核對洋文查赫德申稱所訂草約四條與澳門洋
報所載者文義輕重懸殊第一條派使來華擬議通商
條約洋文內加須有利益均霑字樣第二條葡國永駐
澳門管理一切洋文內加悉與葡國別處屬地無異字
樣草約內澳門字樣凡三見洋文皆作澳門及澳門附
地查附地二字意極含糊不惟將圍牆外至望廈村陰

括在內卽附近小島毗連村落皆可作附地觀至謂與葡國別處屬地無異一語措詞亦謬雖洋報所載未盡可信要其有意朦混藉圖侵占傳說必非無因旣與總署奏案不符亦非奉旨准其永駐之本意應請飭下總署先將草約漢洋文詳細校對以防狡混而免侵越一曰暫緩批准立約雖有成議批准權在朝廷此各國之通例美國煙臺條約光緒二年所立有未經批准三條直至上年始行議定成案可據自應明與之約定約後須俟稅釐款項大增拐騙逃亡隨捉隨解諸事皆有明效可徵兩國始行批准互換庶彼不得終售其欺以上

五條皆就原約之中力籌萬全其間自必有總署所已
經計及者亦容有澳地情形總署所未能深悉者謹竭
管蠡所及以備挽救之資竊思葡人至貧至弱素爲各
國所輕食用則仰資粵產貿易則專仗粵商其於粵尙
不能無所顧忌今旣允其立約并准其永住澳門港報
所譯又有利益均霑之條是葡人所獲已多卽此次詳
約有所刪增亦足饜其願望况所陳各端皆就草約立
論未嘗有所變更應請飭下總理衙門於該使來華時
就臣所陳細與辨論極力堅持彼能就我範圍自可照
此立約如其不從是棄約出自葡國草約自可任作罷

論香港徵稅章程仍前舉行而於拱北關多設巡船前
山廠多派巡丁水陸截緝漏私當亦無多而葡人必大
有所不便利害相形不數年間彼終不能不就所議來
求立約如此則所損於釐稅者少所全於大局者多矣
臣職在守土利害之大不敢不詳籌瀝陳並將澳門地
形繪圖貼說恭呈御覽
硃批該衙門知道欽此

請斥革劣紳摺

光緒十三年四月二十四日

竊照前欽奉上諭沙田升科之事正賦攸關豈容奸民
蔽匿迭經戶部奏催辦理著該督撫督飭所屬查明已

升科若干畝未升科若干畝卽將未經升科之沙田迅卽確查妥辦具奏等因欽此當經恭錄欽遵籌辦在案茲據廣東布政使高崇基按察使王毓藻會同沙田局司道詳稱查東莞縣屬土名西大坦沙坦自道光初年張積卽經該縣武舉王遇春之父王鎮安私行佔墾匿不報官迨王遇春王葆真父子相繼仍前霸爲己業同治五年因橋朗村陳姓爭佔始以王萬全等出名赴縣報墾一十頃零六十畝其後久逾畝墾之期仍不繳息升科經該前縣裘伯玉盧樂成先後勘丈查出熟田並水白坦較當日報墾之數多至兩倍照例應將該沙坦

全數歸官另行招佃承耕仍勒追歷年侵收花息以示
懲罰乃王遇春父子恃其豪橫置若罔聞既不遵繳花
息仍復照舊霸耕迭經傳質抗不到案此次設局清查
沙田王遇春先經病故其子王葆真霸佔抗違如故且
查該處厚德涌口兩鄉王姓各戶已辦升科沙田應完
經費一萬八千餘兩勒催半年僅繳二千兩皆由王葆
真從中包攬阻撓所致查王葆真中式同治十二年癸
酉科本省鄉試第八十五名舉人光緒二年捐納郎中
分發戶部似此恃符妄爲實於清查沙田大有關礙詳
請奏明斥革究追前來臣等查粵省地大物博衣冠如

林各屬紳士中廉正持躬慷慨好義足爲鄉閭矜式者
指不勝屈而鄉曲之間倚勢牟利魚肉良懦顯干法紀
者亦往往而有向來地方官於此等案件率多遷就消
弭鮮有直發其覆者良以強宗巨室聲氣易通投鼠忌
器之嫌瞻顧卻步之慮誠所未免臣之洞到粵以來於
賢紳則優加敬禮於豪猾害民者從不敢稍存瞻徇如
香山縣侍衛何綸章庇匪歐六翟老振一案順德縣給
事中何崇光大南沙築圍一案南海縣舉人李錫培戶
部主事張琯生戶部郎中潘譽徵等馬頭岡建閘糾眾
焚傷一案新會縣舉人李廷槐庇匪李孖指掌及抗繳

沙田經費一案先後奏奉諭旨斥革究辦非不知其蓄憤思洩必將播煽浮言遇事暗中掣肘然國紀不肅則惠政不行豪強不戢則良弱不安士習不端則民俗不化故甘以一身府怨叢謗而不恤但使一懲百儆則臣等亦不願以苛察自居今沙田爲奉旨籌餉要政而王葆真佔種膏腴六十餘年既不遵例納息完糧亦不退田似此霸匿包抗若相率效尤於賦則餉需大有妨礙仍不能不從嚴究辦以資整頓相應請旨將東莞縣舉人捐納戶部郎中王葆真暫行斥革以便歸案提追究辦

硃批王葆真著暫行斥革歸案究辦該部知道欽此

稅司代收新香六廠貨釐宜防流弊摺

光緒十三年四月十二

十五日

竊臣等於本年三月初一日會同粵海關監督臣增潤電奏新稅司馬根法來格到粵來議附近香澳六廠代徵百貨稅釐事有關華洋界限大局利害現已具摺詳奏可否暫緩改章俟奏到後仰懇聖裁詳察并交總署戶部會同妥議如確無窒礙再當請旨遵行又官鹽例有引地按引繳課私鹽向以香澳爲藪四出充斥若抽其釐便成官鹽各處可銷充占引地正課無出商必不

從各等語正在具摺詳奏間三月初六日准總理衙門來電初五日奉旨張之洞等胡東先等電均悉香澳六廠厯收爲數無幾等因欽此伏讀之下欽悚莫名查洋藥稅釐併徵實有大益於中國餉項經總署籌議經年始有成說臣等實深欣幸此次奉旨飭行粵省卽於正月初九日遵辦統交海關徵收於正月二十四日奏明在案若稅司代徵貨釐臣等先無所聞僅於二月初十日接總署初九日電稱香澳各廠巡緝抽收事宜統交稅司代辦補抽貨釐十數萬卽由稅司經收詳細情形專函另達二月十二日接總署本日電稱鹽私走澳已

囑赫飭新派稅司巡船幫緝向章私鹽是否入官赫以加重抽釐爲勝各等語事關財賦要政更改舊章臣等與增潤有監收之任有地方之責其時尙未接到總署函牘戶部各行而馬根法來格來粵遽請接辦並未賫帶公文倉卒之際不能不益加詳審縷晰上陳祇候飭議妥善以期久遠無弊非敢稍涉拘泥聽受浮言坐誤朝廷至計也荷蒙聖明曲垂鑒察暫罷稅司私鹽抽釐之議復經總署傳諭赫德將停關停驗之洋例更改悉照華章辦理不合貨船延擱臣等前電所云商情不便一節竊幸可冀相安至此外窒礙之端似不能不一一

慮及惟既欽奉嚴旨飭行自應先行遵照辦理除常稅
由增潤飭辦外釐金一項由臣等轉行司局飛飭該六
廠遵於三月初九日一律移交新稅司接收訖伏思代
抽稅釐一節另爲一事與洋藥實不相謀總署兩次來
電一則曰經收釐金不致無著再則曰收得之款照舊
分撥是粵省向有之釐並不減少就事論事豈不樂從
初一日電奏業經聲明至廠員侵漁中飽乃臣等所深
惡而痛絕者臣之洞到任後於釐廠各員參撤甚多使
其有之方欲盡發其覆上陳於 聖主之前上年十一
月遵查覆奏汲水門六廠洋藥稅收支數目奏裁歲支

七萬金覆奏北海關定額請加歲額正餘七千金若瞻
徇屬員之私囊致礙國家之巨餉臣等何敢出此查新
香六廠補抽貨釐上年六月甫經議定陸續開辦其地
逼處澳港開辦之初洋官洋商勾串華商造言阻撓臣
之洞持之甚堅剴切曉諭始得相安計每年所入雖止
十數萬金而保全內地之貨釐實屬不少且凡事皆日
久而弊生此次開辦未及一年又多洋界牽制收數尙
不爲少臣等隨時明查暗訪似尙無賣放中飽情事此
臣等電奏所論固非阻撓併徵亦非不交釐廠之實在
情形也竊謂餉項固屬難籌隱患亦不可不杜用人固

貴專一流弊亦不可不防謹將豫防此後窒礙各節暨
稅司到粵以後情形並前電未及詳奏之處敬爲 聖
主一一陳之一曰踰險查六廠曰汲水門曰九龍司向
設有九龍司巡檢大鵬協副將曰長洲曰佛頭洲此四
廠水陸均屬新安縣轄在省城外東路虎門之外近接
香港曰馬留洲曰前山寨設有前山同知此兩廠水陸
均屬香山縣轄在省城外西路橫門磨刀兩門之間近
接澳門是以厯屆奏報稱爲新香六廠汲水門爲香港
入省海道必由之路九龍爲香港赴省城暨惠州陸行
必由之路佛頭洲爲香港赴潮州汕頭海道必由之路

長洲爲香港赴澳門海道必由之路前山爲澳門入香山陸行必由之路馬留洲爲澳門赴高廉雷瓊四府海道必由之路廣東省垣東爲香港所阻西爲澳門所扼事事牽制已有喉骨胸刺之憂自同治七年以後釐務局粵海關先後開辦藥釐藥稅百貨稅在該處分設六廠計海關釐局共十二廠上年補抽貨釐以九龍附於汲水門故亦稱五廠各該廠委員勇役輪拖各船分投巡緝人數不少自洋界過此隱若關隘各廠聲勢聯絡與洋界消息易通哨探亦便於徵榷之中實兼有巡防之益今英葡藉洋藥併徵一端乘機要挾始欲撤卡繼

欲代徵常稅釐金後并欲代徵私鹽釐金於是數百里海面巡船巡勇胥授權於洋人將來必有事事掣肘之憂藩籬盡撤之患此形勢之窒礙一也一曰混界九龍與香港對岸汲水門長洲佛頭洲皆各自爲島環繞香港近香港耳非香港也馬留洲拱北灣均在澳門西隔海亦各自爲島前山在澳門西北陸路相連中隔關閘近澳門耳非澳門也洋人妄稱香澳六廠已隱伏蒙混占地之根本年二月初五日臣之洞電達總署在案乃三月十一日接新稅司馬根來函封寄赫德單銜告示一紙內稱澳門附地添設新關一處名拱北關香澳附

地添設新關一處名九龍關等語實堪駭異傳有之惟
器與名不可以假人今乃以分明我疆指爲外邦附地
旣敢懸諸告示從此登諸案牘英葡兩國得步進步居
之不疑粵省政令不能出海口一步後患豈可勝言近
年住澳葡人於三巴門外踰界徵租臣之洞屢與勘查
辯駁正在設法禁制其耽耽之意確有明徵在赫德或
由委曲求成圖加薪俸所致然臣等不敢謂英葡必無
希圖占地之心此界務之窒礙二也一曰侵權楚材晉
用從古有之洋關開設之初中國未悉外國商情不能
不暫用洋人然洋員但司查驗貨其法令文告仍由

南北洋大臣監督關道主之稅司間有曉諭不過諭知
洋商洋船而已其徵銀仍存關庫故有利而無弊今馬
根法來格來粵並未持有總署公文總稅司申文竟由
赫德單銜出示諭飭華商華民華船並不知會海關是
粵海兼轄之說不過徒存其名遇有民船華商罰禁懲
辦概由稅司徑行主持發落地方大吏並不與聞州縣
更無論矣西例最重者權利今以洋員全奪地方官之
權撓我內政以後粵省虎門以外縱橫數百里耳目所
習將不復知有華官法度非特利權有損并於事權有
妨易曰履霜堅冰至言漸之不可不慎也此事權之窒

礙三也一曰擾民現又接總署來函據赫德申呈香澳兩處新設分關華船有從通商口岸前往者有從不通商口岸前往者有從不通商口岸未設粵海分關處前往者可分三等抽收按通商稅則完納正半各稅發給船牌等語所謂通商口岸者有洋關處所也不通商口岸者有常關無洋關處所也不通商而又無粵海分關者內河行釐坐釐及各府雜稅設關設卡之地也赫德因洋藥併徵而關及貨釐關稅今更因新香六廠之一隅侵及沿海內河之常稅雜稅行坐各釐且欲將各屬民船民貨悉改用洋稅章程盡籠粵省內外大小之利

權併而歸之香澳之地稅司之手齊之以洋關之法疑
民改制全省紛擾得隴望蜀長此安窮此民情之窒礙
四也一曰有礙海防昨准粵海關監督增潤咨稱接
赫德照會內稱新設海江防私巡緝稅務司之缺查有
粵海關右副稅務司葛雷森堪以充補等語該稅司當
卽將來管帶新設巡輪之員查該稅司專爲緝私而設
只可稱管帶緝私輪船何以攬入海江防字樣若謂防
私卽係緝私文義亦屬牽強顯係蒙混影射欲以稅務
司而兼海防江防之事查光緒初年赫德曾有自請充
總海防司之說經故協辦大學士沈桂芬駁斥而止以

前證後顯然可疑今合六廠水陸船勇均由洋弁管帶並有外洋新造巡輪十一艘江海皆可任意來往一旦有警或與英國稍有違言所帶之兵船所踞之關卡向無華官在事豈能驟令全行交出棘手殊多此海防之窒礙五也一日虛誑不實英人原議香港設關洋商不報稅不得開箱故我如其請以予之今港官不允洋界設關之舉港商不允不開箱之條近雖聞有出具保單議罰之說恐走漏亦所不免至香港向有煙膏公司每年繳餉十八萬元於港官併徵既重不漏私土必漏私膏查每土一斤熬膏八兩是藥膏之稅釐應較藥土加

倍今總稅司議每膏百斤收稅三十七兩五錢釐一百兩是未成膏者藥土百斤稅釐二百一十兩既成膏者藥膏五十斤實係藥土百斤只完稅釐六十八兩有奇港之膏商包攬圖利必爭熬膏分運港官之膏餉日增中國之藥徵日絀每年八百萬之數誠恐難期彼願已償而我利未見此食言之窒礙六也一曰要挾無已准總理衙門咨稱澳門歸葡國管轄訂立新約已經奏准咨行此事關係甚鉅立約必須詳審另摺詳陳查中國各省租界甚多雖暫無收回之舉而種種管轄辦案權利章程租界與屬地判然各別果使藥徵有效而英人市德

援澳門以爲詞各國效尤援英葡以爲例拒之則不允
助緝許之則枝節日多舐糠及米何所底止此滋蔓之
窒礙七也爲今之計似宜熟籌盡利防弊之法約有數
端一請先行試辦一年伏讀此次電旨本有此後辦理
設有窒礙儘可隨時變通復歸舊制之明文仰見聖慮
周詳默寓時措咸宜之妙惟事關交涉必以豫定爲宜
擬請敕總署與英葡約明作爲試辦如一年後尙無成
效或別有窒礙卽當仍復舊章一請添設華官各廠除
稅司外仍由粵省每廠各派委員一人稅司報總署委
員報督撫監督互相維繫卽如洋關雖用稅司仍歸監

督關道造報督撫按結奏聞並無掣肘之事今釐金係地方官所收常稅係監督專管督撫兼轄自應有地方委員在事一以存餽羊之意一以備習練之資他日設須改章亦易接手一請由總署明文行知總稅司新稅司此六廠係代抽內地稅釐所辦理皆係民船華商之事此六廠照舊歸督撫兼轄或總督兼轄查各海關無不歸所在督撫兼轄者此係各洋關通例况代收民船貨稅貨釐尤有不同一以後該關遇有曉諭商民之事仍照向章由總督監督出示稅司不得徑自單銜出示一體制文移宜照各海關通例令該稅司用銜名印文

申報總督照會監督總督監督應行知照該稅司之事
照章分別劄知照會以符向章不得僅用信函收數由
督撫監督照舊分別奏咨以備稽核而便維繫一九龍
司拱北灣兩處以後總稅司新稅司文牘宜稱爲粵地
不得混稱香澳附地速將從前告示錯誤更正一議明
徵銀不宜交香港匯豐銀行不得於九龍地方令匯豐
擅設分號查各該廠設有巡船巡勇向來不致疎虞每
月所收儘可遵照總署戶部所定分撥之數分別解交
海關釐局存儲無多自無庸存放香港各海關稅司向
無自設銀庫之事此六廠自應照辦以符通例一巡船

管帶管駕各弁宜仍用中國員弁由粵省派委聽稅司
調遣考察如有不力及舞弊者准該稅司申報總督立
時撤參更換一管巡船之員弁只宜稱管帶緝私船稅
務司將海江防三字刪改以昭核實一九龍稅司現住
香港並不住九龍至拱北稅司亦不住拱北灣在澳門
賃屋居住所有該兩關廠卡乃中國辦公之所官吏體
統所繫商民眾目昭彰其屋舍仍用中國公所舊式不
得改易前觀建造洋樓緣該廠距洋界太近易涉嫌疑
亟應豫爲之防以定民志一議定以後他處稅釐不得
援例推廣總之洋藥併徵與常稅釐金本是截然兩事

英國既允開辦卽由海關原設之稅務司併徵似亦未嘗不可該兩國果肯助緝則隨時函知電知省城原設之新關稅務司儘可稽察不漏或以九龍拱北專設稅司便於聯絡則洋藥自歸稅司稅釐自歸委員並無干涉並無妨礙何以稅司必欲代我抽收民船貨船貨釐其中自別有用心所在已屬顯而易知且廠員未必人人皆不肖大吏未必任任皆縱容固間有舞弊之事亦常有發覺參黜之時極而言之止此六廠縱有數千金雀鼠侵蝕之微似亦不敵數百里門庭隱患之鉅此事在總署反覆酌定無非爲有裨國計極費籌維然立法

不厭精詳庶期盡臻美善竊揆赫德之爲人大約類乎
儀秦縱橫一流才幹甚敏心計甚深爲中國效力有年
非無勞績可觀而其意實欲兼攬各國之權互相挾持
以自重此舉增稅則似乎利華得地則似乎利葡移界
據險布散徒黨於海面盡存稅銀於匯豐市德樹援於
澳門其策仍歸於利英而其實則歸於自利朝廷駕馭
羣材自必已灼見隱奧似宜量加限制庶得其力而不
受其欺伏思廣東爲中華海疆第一道門戶粵防弛則
沿海皆爲兵衝粵力盡則南洋更無可恃此事關涉重
要臣等屢與司道以下各官籌議無不同切隱憂諭旨

自不敢不遵而有關地方利害此舉未盡事宜自亦不能不計臣等雖至愚極陋亦知共體時艱斷不致爲粵省地方官與稅司爭權况無損粵餉更何必爲粵省司局與稅司爭利特以中外大防所繫苟有管蠡之見不敢不上達宸聰誠恐他日流弊漸著悔不可追則臣等罪戾滋重伏懇聖明俯加權度敕下總理衙門戶部詳核妥議請旨遵行大局幸甚粵省幸甚臣等荷聖上高天厚地之恩受一方疆土人民之寄但願所言之不驗不願朝廷之有悔不勝惶悚屏營待命之至

硃批該衙門議奏片圖併發欽此

六廠貨釐宜儘徵儘解并請免指撥片

光緒十三年四月十二

日十五

再汲水門等處六廠補抽貨釐現已歸併稅司徵收前接總署來電云收得之款照舊分撥又據稅司馬根面稱所收釐金暫存匯豐聽候提用各等語查釐金本無定額此項補抽貨釐開辦未及一年計自上年六月底七月初各廠先後開辦至本年二月底止此八箇月內共收銀約十萬兩初辦數月類多周折觀望冬臘後收數逐漸增多所謂每年可收十數萬之說原係就現收數目按月約計而言至此後商情既孚規模既定必更

日有增益事理昭然歲收或能增至二十萬以外亦未可知但以後之旺淡終難臆料若定額徵若干則長收固不能作爲贏餘短收亦難責稅司賠繳似宜令該稅司儘徵儘解所收釐金按月解交釐務局充用分別造冊具報總理衙門暨兩廣總督粵海關監督衙門查核可否請旨敕下總理衙門飭知總稅司轉飭照辦至該六廠開辦之由因粵省近年富商貿易羣遷港澳大宗貨物皆由輪船近海港汊民船復多繞越以致內地釐金日形虧絀是以設法開辦新香海口補抽原欲以海口之所長補內河之所短而猶虞不足此乃通省正釐

盈虛相抵並非閒款可以存儲相應懇天恩飭部毋庸指款提撥庶無窒礙再該六廠所收另有棉花棉紗豆子火柴火水油五項係抵補省城坐賈釐金又有帶抽商捐巡緝經費貨物數種向由各該廠就近帶收現在廠員既撤只可一併交稅司暫行代爲試辦所收棉紗等五項係應歸入省城坐賈之款所收巡緝經費更係另案商捐奏明專款待支之項發交釐則章程內已經聲敘明晰皆不在每年十數萬正釐之內合併聲明至於收數稅司有冊可稽臣等當飭司局併入粵省原有補抽貨釐照案分晰造報以備稽核

請開缺回籍調理摺

光緒十三年閏四月初四日

竊臣前因交卸兼署撫篆後舊疾復發奏懇天恩賞假調理本年四月初三日差弁齎回原摺奉硃批著賞假一月欽此恩慈體恤欽感莫名惟自上月初三日至今已及一月公事繁劇未獲休息所患肝木舊證鬱塞作痛仍復未見輕減而精神漸形委頓夜寐不安飲食減少稍一用心便覺怔忡無已醫者云肝脾交病心氣太虧非藥餌所能速效伏念兩廣嶺外大府南洋首衝臣以庸才叨竊非據亟思殫竭駑鈍稍補時艱而德器淺薄學術迂拘吏習未底於澄清民氣未臻於康樂綢繆

之策未周綜核之術多拙心因力阻悚與愧俱雖無片刻之偷安終鮮寸效之可紀重以疾病侵尋神智困敝若再勉強支拄馴至隕越既辜恩遇亦負初心惟有仰懇天恩俯准開缺回籍調理另簡公忠方正習於兵略之大臣來粵接任以免貽誤臣年甫五十將來調治就愈報國之日尙長斷不敢自甘暴棄有負高厚生成至目前緊要事務臣仍當力疾會商撫臣辦理
硃批再賞假一月毋庸開缺欽此

籌議移設廣西邊要各缺事宜摺

光緒十三年五月初三日

竊臣等上年具奏籌議廣西邊隘分營扼紮請撥的餉

酌移提督駐所添設鎮道以資分任各節奉旨該衙門
議奏等因欽此旋經兵部會同吏部戶部議奏欽奉諭
旨刷印原奏咨行到粵當經轉飭議覆去後茲據署廣
西布政使凌彝銘署按察使周鶴會同善後局司道籌
議詳覆並准廣西提督臣蘇元春咨轉據該營將守備
等節次稟覆該提督逐加考核先後造具清冊呈送前
來由臣秉衡臣元春商定具稿咨送臣之洞核辦查原
咨詳內稱柳州府提標額設制兵六營一千二百六十
名除分防外存城八百餘名現在中營移駐龍州擬裁
去前後兩營所留左右城守三營僅留五百十六名若

照原撥汎防之永福雒容象州柳城馬平等州縣屬境
二十一處則存城兵額較少不敷操防擬將中路所管
之永福縣城守深定黃冕寨沙鹿寨五汎改歸桂林營
就近分防前後兩營所管之雒容縣城守中渡洛垢高嶺
象州城中大東馬平縣穿山等七汎左右兩營所管之
馬平縣振柳白沙三都雞公五都流山柳城縣城守太
平等八汎改歸柳慶鎮左右兩營及柳州城守營分別
派防其各汎在郡城之左者撥歸左營在郡城之右者
撥歸右營其土博魚窩下吉三汎前因匪徒滋事於光
緒三年添設現在地方安靜應卽裁汰歸入五都汎以

省繁冗又中路之振柳白沙流山三汛附近城南應歸城守營就近管理計各汛派出兵一百七十五名存城尙有四百一十一名擬於裁汰前後兩營內挑留十四名合成六百名仍分六戰四守每百名內設馬兵六名以符舊制其鎮標左營兼管中軍差務較繁擬撥二百五十名右營擬撥二百名其餘一百五十名歸入城守營所有存留各兵應在五營內一併挑選務期精壯足額毋任疲冗充數餘者卽作爲前後兩營悉予裁汰惟左營遊擊所轄原有守備千把各員今旣兼管中軍較之左營尙少千總一員自應一併添設又柳州城守營都

司所轄原有千把外額六員向無防汛今既派有分防
不敷差委應添設外委一員額外二員卽在前後兩營
員弁內酌撥其永甯州守備一營原歸提標中營應改
隸鎮標左營管轄至龍州城守營遊擊所有原防苛村
汎水口關兩處悉仍其舊應設守備一員千總一員把
總二員外委二員額外二員卽在原營員弁內挑補並
添設下凍土州防汛以臻周密又新太協右營應行裁
撤所有該營守備原駐之明江廳及各弁分防之甯明
海淵思凌等汛應由煇燾營弁兵接替撥提標中營弁
兵填防平而關鎮南關由隘三處以補龍憑煇燾兩營

所遺之額其餘該兩營及左營原防各汛悉仍其舊又上思營都司向隸左江鎮管轄亦係責任邊防原奏未經議及茲應將該營都司改爲專屬提標以歸畫一此外尙有平樂協副將全州營參將賓州營參將桂林營游擊四協營向歸提標舊轄應照原制無庸更改除新設龍州城守營中軍守備原係內地部選之缺今移駐龍州煙瘴地方亦應改爲煙瘴題調缺其餘改撥各缺均應仍照舊制辦理其建造移設提督道員以下文武各衙署應由西省籌撥經費另行奏咨辦理此遵照部議查明移改營制並續擬分撥之詳晰情形也至所擬

新設太平歸順兵備道一員控制邊關經理中外交涉
諸務責重事繁非精明幹練熟習兵事之員弗克勝任
擬請作爲衝難邊要兼煙瘴題調缺酌照廣東雷瓊道
直隸津海關道湖北漢黃德道之例由外酌量奏請升
調揀補歸順州知州缺原繁難兼煙瘴題調要缺今升
爲直隸州管轄鎮邊一縣擬請仍作繁難煙瘴要缺由
外揀員調補五年俸滿在任候升小鎮安通判一缺原
係煙瘴要缺今改爲鎮邊縣屬於歸順直隸州擬請作
爲繁難煙瘴要缺由外揀員調補三年俸滿在任候升
並添設道庫大使一員鎮邊縣典史一員擬均作爲煙

瘴調缺三年俸滿在任候升其餘上思鬱林等州僅係撥隸別無更張其缺分自應照舊並援案擬給該道員及道庫大使鎮邊縣知縣典史各員廉俸役食銀兩暨添設裁改各營之俸餉等項銀兩分別核明造冊備查其餘未經添改各營毋庸備造以省繁牘此遵照部議體察地方情形酌定逐項缺分之詳晰情形也至小鎮安通判改爲鎮邊縣該處應試童生向入鎮安府學者今爲歸順直隸州屬縣自應另設學額擬請歲科每試取進四名廩生二名四年一貢武童歲試取進四名該州縣均係科歲併行卽令就近附在鎮安府城考棚校

閩並擬援照崇善凌雲天保等縣併歸太平泗城鎮安等府學兼管成例將鎮邊縣生童由歸順直隸州學正兼管毋庸另設該縣訓導以節糜費又上思州改歸太平府轄向之赴試南甯者自當改赴太平惟太平考棚狹窄未能容納多人應令上思生童仍赴南甯考試俟該處籌款另建寬展考棚後再行飭赴太平考試此又改設縣治另定學額就近赴考兼管之詳晰情形也所有新設之柳慶鎮總兵一缺應請旨迅賜簡放其新設之太平歸順道一缺俟部議核定缺項後卽當由廣西撫臣會同督臣酌量揀員分別升調請補以便舉辦一

切事宜所有鎮道暨此外添設各缺均請敕部頒發關防印記以資信守其餘未盡事宜應俟該鎮道到任察看情形陸續詳請奏辦至廣西協餉解未足額臣之洞已飭廣東藩司陸續竭力籌解其各省欠解數目業於上年十一月會同奏明應請敕部查照前奏指撥的餉以濟要需

硃批該部速議具奏欽此

張文襄公全集卷二十終

吳縣周仰公校